محضر مباحثات الرئيس جمال عبد الناصر مع الرائد عبد السلام جلود عضو مجلس قيادة الثورة الليبية القاهرة – منشية البكرى في ١٨ مارس ١٩٧٠

الحاضرون

الجانب الليبي:

الرئيس جمال عبد الناصر، أنور السادات.. نائب

الجانب المصرى:

رئيس الجمهورية.

الرائد عبد السلام جلود.. عضو مجلس الثورة الليبى ونائب رئيس الوزراء ووزير الداخلية والحكم المحلى.

المحتويات

	الموضوع	الصفحة
-1	جلود في طريقه الى الصين لطلب أسلحة ذرية!	۲
-۲	استيراد مصر للمواد الغذائية	٧
-٣	بحث نقل الكليات الحربية خارج مصر حماية لها من العدوان الاسرائيلي	٧
- ٤	علاقة عبد الناصر بزعيم الصين شوين لاى منذ مؤتمر باندونج في ١٩٥٥	١.
-0	القذافي يريد الاسراع في المشاريع الزراعية والصناعية	17 - 18

محضر مباحثات الرئيس جمال عبد الناصر مع الرائد عبد السلام جلود عضو مجلس قيادة الثورة الليبية القاهرة – منشية البكري في ١٨ مارس ١٩٧٠

عبد الناصر: ازاى الصحة؟

جلود: الحمد لله.

عبد الناصر: يارب تكون اتبسطت هنا ماتعبوكش، تعبتوه؟

مصرى: لا.. راح اسكندرية.

عبد الناصر: راح اسكندرية أول مرة؟

جلود: أول مرة.

عبد الناصر: بلد جميلة اسكندرية جدا آه.. قعد فين، بات هناك؟

مصرى: آه.

عبد الناصر: في اللوكاندة ولاَّ؟

مصرى: في فندق فلسطين.

عبد الناصر: أنا عندى اللوكاندة أحسن من القصور لأن يعنى الواحد يقعد مع الناس، يقعدونى فى قصر الضيافة والناس كلهم يبقوا فى اللوكاندة فهم يشوفوا الناس وأنا أبقى لوحدى قاعد محبوس!

جلود: فلسطين.. وهو قال لي سيادة الريس بيحب بيجي هنا.

عبد الناصر: فلسطين أجمل، أنا مولود هناك أصلا والدى واخواتى وكل عيلتنا هناك، بس لما بروح اسكندرية صحتى بتيجى على اسكندرية.

مصرى: هو جو نفسى بيساعد جدا على..

عبد الناصر: دلوقتى مقدرش أروح كنت الأول بروح كتير، جنب غرب اسكندرية بحوالى ٥٠ كيلومتر فيه استراحة هناك في الصحرا اللي هي برج العرب.. دى بقى جفاف ومنطقة صحية جدا، دلوقتى الواحد ما بيقدر يروح!

قالوا لى: مسافر النهارده.

جلود: آه.

عبد الناصر: بتروح باكستان؟

جلود: آه.

عبد الناصر: كويس يعنى بس هم الصينيين معندهمش. يعنى كان بالنسبة للأمريكان الغرب يعنى سياستهم منسقة مع بعض، صفقة الميراج بعد كده يعنى هيحصل ضغط ومخدنهاش، الوحيدين اللى هيبقوا قدامكوا الروس، الصين هتروح تطلب أسلحة ماعندهم أسلحة. لما راح رئيس أركان حرب الجيش السورى ادوله رشاشات وادوله بنادق وشوية حاجات من دى و RBG ضد الدبابات بتاع المشاه، بس قالوا له: اللى عندكوا للاتحاد السوفيتى!

صوت: الحقيقة الأسلحة الذرية..

عبد الناصر: وانت جايب أسلحة ذرية هنا ابقى عدى علينا اديلنا سبت! (ضحك)

جلود: (ضحك)

عبد الناصر: هتطلب منهم تقول لهم: إدونا أسلحة ذرية؟! هيضحكوا عليكوا يعنى والله يعنى زى الولاد أكنك عايز حمص.. عارف حمص ايه؟

جلود: إحنا قلنا للعقيد القذافي: مش معقول، قال: قولوا لهم أسلحة ذرية تكتيكية بس!

عبد الناصر: أنا أتكلمت مع شواين لاى أنا شخصيا على أساس نستفيد من خبرتهم هناك ونبعت ناس، بعتنا وفد وراحوا قابلوهم وزوروهم المفاعل وقالوا لهم: لأ.. إنتو يعنى تعتمدوا على نفسكوا، الروس بقى عملوا لنا المفاعل. إحنا عندنا هنا المفاعل لكن مايديش البلوتتيوم اللى هو بنعمل بيه قنبلة ذرية لأنه ٢ ميجا وات بس، الاسرائيليين عندهم مفاعل ٢٤ ميجا وات ده اللى عمله لهم الفرنساويين بعد ٥٦. يعنى هو إنت بتيجى بتسأل على ايه الأسلحة اللى يدوها لكم، يعنى هو الاقتراب من الموضوع أصله صعب؛ يعنى أما تقعد كده تقول لهم ادونا أسلحة ذرية، الناس هيبصوا لك كده ويوسعوا عينيهم كده ويقولوا: ده لازم جاى من المريخ! (ضحك)

أصوات: (ضحك)

جلود: نقول لهم: إن الأسلحة التقليدية مش نافعة، عايزين غازات أى حاجة.

عبد الناصر: لأ.. غازات إحنا عندنا، يعنى إحنا الغازات طبعا الروس ميدوناش غازات لكن إحنا عندنا مصنع بس بيتكلف طبعا، يعنى الحقيقة بنطلع دلوقتى الغازات السامة كلها وغازات الأعصاب، بس العملية الحقيقة مكلفة، ومعبيين بالطيارات ومعبيين بالمدافع كله موجود. وادينا السوريين، يعنى هم قالوا: عايزين والدنيا كلها محدش رضى، أنا قلت لهم: إن إحنا عندنا لكن لو عايزين ادونا مصاريف لأنه مشكلته العملة الصعبة.. إدتهم ودفعوا وخدوا الحقيقة.

جلود: نقدر نشتری.

عبد الناصر: آه.. يعنى لأن هم اليهود قطعا هو دى مفاجأتهم الجديدة إن هم قرروا إنهم يشتروا كمامات لكل الشعب مش للجيش بس، إحنا مستحيل نجيب كمامات لكل الشعب إحنا لغاية دلوقتى مش قادرين، إحنا عندنا مصنع.

جلود: للكمامات؟

عبد الناصر: آه.. بس مطلّعين حتى للجيش أنا قولت لهم قريب عشان العمال المدنيين اللي في الجيش ياخدوا.. بيتكلف يعني كل واحد بيتكلف.

جلود: كام تكلفة الكمامة؟

عبد الناصر: الكمامة الواحدة أظن بتطلع لها بـ ٥ أو ٦ دولار. طب وإنت راجع عدى علينا بقى، آه والله أبعت لنا خبر.

جلود: النتائج.

عبد الناصر: آه.. يعنى أولا إحنا لينا السفارة في الصين ولينا سفير هناك اذا حبيت يعنى عشان يبقوا معاك مترجمين، إنتو ملكوش سفارة بس ملكوش تمثيل سياسي إنتو عندكوا فرموزا.

جلود: فرموزا.

عبد الناصر: فسفيرنا هناك هيبقى تحت أمرك اذا حبيت يعنى ممكن سامى يبعت لهم برقية، هل ليكوا سفارة فى الباكستان؟ ليكوا.

جلود: آه.. السفارة الصينية هنا في القاهرة أعطننا جواب، هو ده اللي خلى العقيد قال للسفير اتصل بالسفارة هنا وأعطونا جواب.

عبد الناصر: لأ.. اذا حبيت تبعت هي رسايل تبعت عن طريق سفارتنا، اذا حبيت مندهمش خبر ونخليها سرية، ممكن سفيرنا يعني منقولولوش لكن إنت في أي وقت عايز حاجة من السفارة بتقول لهم أبعت له رسالة للعقيد، عندنا إحنا هناك لاسلكي مباشر.. إحنا عندنا هنا عندنا شبكة لاسلكي خاصة بالاتصالات.

جلود: ممكن لأن الحاجة دى الموضوع مهم مش سهل يعنى.

عبد الناصر: يعنى علشان نقترب من عملية الأسلحة الذرية، بتقول لهم: إن إحنا عندنا أخبار إن اسرائيل هتتج أسلحة ذرية وإن ممكن انتاجها يكون قريب جدا وده بيهددنا خالص، حتى نستطيع أن نعمل تعادل لجأنا اليكم فما هو رأيكم؟ متهيألى هو ده المدخل الوحيد للعملية وإلا اذا رحت لهم وقولت لهم إدونى كام قنبلة ذرية يعنى هو ده! يعنى إحنا الروس قالوا لنا: لو هنتهدد ذريا هم بيدونا cover بيدونا غطاء ذرى على طول يعنى، وعلى هذا إحنا قبلنا اتفاقية..

جلود: اتفقت أنا وفتحى الديب على أساس بنجهز وفد عشان...

عبد الناصر: لأن الحقيقة دلوقتى يعنى العقيد لما جيه هنا أنا قولت له كل حاجة علينا يعنى، أنا قولت له على عملية..

جلود: الروس مبتعولناش حاجة مش عارفين!

عبد الناصر: إنتو طلبتوا منهم وهم..

جلود: لا.. وكل مرة بنجيب السفير...

عبد الناصر: ده أنا عندى دلوقتى اللى بيدافع عن القاهرة الروس، النهارده وصلوا الروس موجودين وأنا فى بنغازى – إنت ماكنتش موجود – دلوقتى الطيارين الروس جم، الطيارات الجديدة جت، الصورايخ جت، كل الحاجات المعدات الخاصة بالتكنيكية كلها جات الحقيقة يعنى الناس.. وبعدين أنا باخد منهم مبدفعش ولا مليم يعنى كتر خيرهم.

جلود: عايزين نعمل المعادلة ناخد منهم إحنا.

عبد الناصر: وبعدين هم حساسين جدا من موضوع الصين لأن هتروح للصين هيشتموا في الروس شتيمة يعني!

جلود: وبعدين هم سمعوا.

عبد الناصر: مين؟

جلود: السفارة الصينية هنا كل يوم عايزين وفد، إحنا عملنا ترتيبات إحنا ماشيين انتين بس معايا واحد بس للعلاقات التجارية.

صوت: سوق ليبيا مفتوح للشرق والغرب وكله، وبيتعامل مع الصين الشعبية بالاستيراد بيستورد رز بيستورد قماش.

جلود: وزير الاقتصاد السوداني قال لنا الأشياء اللي موجودة.. وزير كويس.

عبد الناصر: مين؟

صوت: محرم سليمان وزير الاقتصاد السوداني.

عبد الناصر: سليمان كويس أوى يعنى.

جلود: بس العقيد قال الحاجة دى مش مهمة متاخدوهاش، قلنا: لأ.. أحسن ما نضايق الشعب.

عبد الناصر: لا.. مافيش داعى تضايقوا الناس لغاية ما.. أنا شوفت إنهم بيقولوا: عايزين يمنعوا الكماليات! ما تدخلوا في مشاكل، يعنى أنا هنا بفتح دلوقتى الكماليات يعنى إحنا هنا عملنا الـ dollar shop.

جلود: العقيد قال لي: إنت مش ثوري إنت مصلح!

عبد الناصر: لا.. لا.. الحاجات دى بالتجربة هتفهموها.

صوت: في المرحلة الأولى الحقيقة مش عايزة ضغط على الشعب.

عبد الناصر: إنتو الشعب قليل واستهلاكه.. إحنا كل سنة بنزيد مليون وكسر دلوقتى، إحنا يوم الثورة كنا ٢٠ النهارده داخلين على ٣٣ وكسر .. مليون كل سنة زيادة.

جلود: أنا شفت الزراعة في مصر وكيف مصر بتستورد مواد غذائية؟!

عبد الناصر: ٢ مليون طن قمح إحنا بنستورد، بنستورد درة وبنستورد الزيت معندناش؛ لأن سنة ٥٢ كنا ٢٠ مليون بقينا دلوقتى ٣٣ مليون زاد ١٣ مليون؛ كيف نوكل هؤلاء الناس؟ هذه معجزة! يعنى ماهو أنا مشكلتى ايه النهارده؟ إن ٢ مليون طن قمح على طول بـ ٦٠ – ٦٥ مليون جنيه! إبقوا روحوا زوروا الكلية البحرية.

صوت: محافظة البحيرة أنا عندى إبنى هناك.

عبد الناصر: فين؟ ابنه في الكلية..

جلود: الحربية؟

عبد الناصر: آه.. وأنا عندى عبد الحميد هناك، بعت جواب امبارح لوالدته.

جلود: مبسوط؟

عبد الناصر: آه.. بيقول مبسوط ويظهر محبوسين مبيطلعوش.

صوت: لأ.. إحنا لازم نعمل له ترفيه!

عبد الناصر: اجازة، وأنا كنت قلت لفوزى أساسا هناك أصلا مش مسموح بكنتين فى الكلية ولا حاجة خالص، اذا كان هيحبسوهم يبقى لازم يعملوا لهم كنتين، وبعدين لازم يعملوا لهم فيلم سينما فى الأسبوع يوم الخميس والجمعة مثلا.

جلود: سوسة جميلة خالص.

عبد الناصر: هو فوزى راح هناك وقال لى زى سويسرا! هو توزيع الكليات النهارده يعنى بالعملية دى قد يكون خطوة متسرعة.. إن الكلية أصلها عايزة قاعدة وعايزة مدرسين، طب هنودى. إنتو عندكوا الكلية الحربية؟

جلود: عندى الكلية الحربية.

عبد الناصر: ولكن إحنا بنعلم العقيدة الشرقية وإنتو بتعلموا العقيدة...

جلود: ممكن تبقى مقبولة ممكن نجدد على طول العقيدة يعنى..

عبد الناصر: وقصدى قبل ما ننقل الكليات لازم نوحد العقيدة والمصطلحات والعمليات اللي بهذا الشكل.

جلود: لا.. ممكن نبدأ بالكلية نتوصل للعقيدة الشرقية.

عبد الناصر: طب هتبقى عقيدة شرقية، بدال المدرسين مصريين هم اللى واخدين العقيدة الشرقية مش هيبقى فيه مدرسين ليبيين، انما معمول الكلية الحربية في السودان وكلية الطيران في ليبيا والكلية البحرية. وبعدين هو بالنسبة للكلية الحربية، الحقيقة إحنا بناخد مثلا في الكلية الحربية في السنة ألفين، إنتو تاخدوا كام في الكلية الحربية في السنة؟

جلود: ١٥٠.

عبد الناصر: والسودان كذلك، فمثلا ألفين من هنا بوديهم للسودان؛ أنا بتبقى عندى أزمة مع الأمهات هنا مش كده ولا لأ؟! بيعملوا لى مشكلة والله! يعنى أنا عندى هنا فى البيت من أيام عبد الحميد ما سافر بقيت عندى مشكلة.. سافر ومبيطلعش اجازات ومحدش بيزوره؛ موضوع إنت عارف الأم! وبعدين أقول لك بقى: معروف إن إحنا بعتناهم حماية، فهو الموضوع الحقيقة عايز بحث أنا قولت لفوزى: يعنى بيبعت يقول إننا لسه هنبحث الموضوع بالنسبة للحكومة.

صوت: برضه الحقيقة يافندم من ناحية اخوانا الليبين، كل اللي اغتربوا من ليبيا اللي ظاهر يعنى كلهم والسودان النهارده عندهم زيادة..

عبد الناصر: فيه ليبيين في السودان؟

صوت: الكلية الحربية باعتين شكاوى مش عاوزين يقعدوا؛ طب ما المصريين زيكم مغتربين.

عبد الناصر: أنا رأيي مانتسرعش باتخاذ خطوة بهذا الشكل.

صوت: عشان میحصلش رد فعل.

عبد الناصر: وليه نبتدى بتوحيد الكليات، ما إحنا الأول نبتدى بتوحيد الأسامى والمصطلحات ثم التكتيك والاستراتيجى والعلوم العسكرية، وبعدين تبقى الخطوة التانية. لكن إحنا بناخد ألفين فى السنة كلية حربية موديهم أنا دلوقتى الى السودان حماية ليهم علشان الطيران مايضربهمش، لكن فى الوقت العادى ما أبعت ألفين السودان كلية حربية كل سنة يبقى عندى النتيجة فيه ٢٠٠٠، وبعدين إحنا عندنا دلوقتى حوالى ٣٠٠٠ فهتبقى تخلق لى مشكلة داخلية الحقيقة.

جلود: الكلية الفنية ممتازة جدا حقيقي الامكانيات.

عبد الناصر: عندهم آه.. ويقدروا لو فيه حتى فلوس بيقدروا يعملوا صواريخ ويقدروا يعملوا حاجات. هاتشوف شواين لاى؟

جلود: آه.

عبد الناصر: سلم لى عليه أصل إحنا كنا صحاب أوى لغاية ٢٧ زعلوا مننا عشان قبلنا ايقاف القتال، السنة دى يعنى اتصلحنا تانى بس كانوا وعدونا يوميها بـ ١٥٠ ألف طن قمح.. كنا محتاجين الحقيقة وكنا مزنوقين، ادونا ١٠ مليون دولار قرض وبعدين..

صوت: بعد ۲۷؟

عبد الناصر: أيام الحرب، وبعدين سحبوا كل الكلام ده! لكن هي البلد ماشية وكويسة وبتشتغل. الحقيقة لازم تشوفوا ازاى ماشيين في الصناعة وتشوفوا الخطة بتاعتهم الحاجات دى تستفيد ايه، التنظيم الحزبي ده أهم حاجة وبعدين ايه التنظيم الحكومي. إحنا عندنا كل ده يعنى لكن طبعا لازم تشوفوا وإيه الورق بتاع التنظيم الحزبي والورق بتاع التنظيم الحكومي، عندنا أيضا هذا الكلام.

جلود: زمان كنا بنحضر مناقشات بتاعت اللجان المختلفة.

صوت: هو عايز يجى يحضر هنا يقعد مع الاتحاد الاشتراكي من البداية للنهاية ويشوف اللجان، بعد الجلاء انشاءالله بنشوف العملية دى.

جلود: مافيش أى حاجة نحكيها مع الصينيين؟

عبد الناصر: مع الصينيين، آه.. يعنى والله إحنا أساسا أيام ما جه شواين لاى أيام الانقلاب اللى حصل فى الجزائر، كان رايح الجزائر عشان المؤتمر لما حصل الانقلاب فقعد هنا يجى ١٥ يوم، وكنا بنتقابل كل يوم ونقعد نتكلم وكانت علاقتنا.. لأن أنا أعرفه من ١٩٥٥ أول مرة قابلته سنة ٥٥ وقابلته فى بورما واتكلمت معاه، وهو اللى اتوسط لنا فى أول صفقة سلاح مع الاتحاد السوفيتى.. قابلهم وقال: الجماعة دول ناس وطنيين وكذا وكذا واتعاملوا معاهم، وبعدين بقى خدنا صفقه السلاح، أنا قلت له أياميها على السلاح، قال: السلاح تاخدوه من الروس. وتوسطنا فى المشكلة اللى بينهم وبين الهند. ولكن طبعا هناك بتعرف ايه الثورة الثقافية وايه اللى حصل.. دى حاجات كويسة وتروح بكين وشانغهاى وتزور أى حتت تزور مزارع، برضه نشوف يعنى الصين فيها دروس كتيرة جدا.

جلود: اليوم ١٠٠ مليون عندهم فايض قمح؟

عبد الناصر: لأ.. معندهمش فايض قمح لا.. لا.. بيشتروا من كندا واستراليا هم برضه أكلهم الأساسى الرز، وبعدين خلى بالك بقى في الأكل هناك بيجيبوا تعابين وبيجيبوا قرود! (ضحك) ايه؟

صوت: مخ القرد.

عبد الناصر: مخ القرد ده لما يكرموا الواحد كويس بيجيبوا له مخ القرد نيئ!

صوت: في الصين.

عبد الناصر: إنت روحت هناك؟

صوت: لا.. أنا عرفت طبعا.

عبد الناصر: فيه سمك نيئ.

صوت: أنا كنت باروح السفارة الصينية بيجيبوا حاجات كده متحركة.

عبد الناصر: قدامكوا؟

صوت: أيوه.

عبد الناصر: أنا كلت عند شواين لاى فى باندونج اتعشيت عنده، بعد ما أكلت قالوا لى: إن الشوربة دى اسمها.. على العموم هناك سفارتنا أى حاجة تعوز اتصل بيهم، يعنى إحنا عندنا سفارة كويسة هناك عندنا مين صلاح العبد؟

صوت: صلاح العبد.

عبد الناصر: جدع كويس يعنى.

جلود: إحنا عندنا بليبيا عيد الجلاء.

عبد الناصر: امتى هو يوم ايه؟

صوت: يوم ٣١ مارس.

عبد الناصر: انشاءالله في أي وقت أنا مستعد آجي لما بتجدوا إن الظروف مناسبة؛ يعنى الحقيقة الزيارة اللي فاتت كانت مفيدة ليكوا أوى لأنها لمت البلد كلها.

جلود: وبعدين فتحى كان عنده ترتيبات علشان العقيد متسرع وعايز مشاريع انتاجية بسرعة.

عبد الناصر: يعنى موضوع المياه، موضوع الأرض أنا قلت لسيد يشوفه أحسن نعمل آبار وهو عنده دراسات عن الموضوع ده.

صوت: برضه المشروع هيتعمل بكرا يوم الجمعة الدراسة الأولى المبدئية وبعدين بعد أسبوع هيعمل دراسة جديدة للمشروع، وانشاءالله نبتدى نتجهز يعنى هو الموضوع مش هياخد..

عبد الناصر: لكن هو قال لى الدور اللي فات: إن فيه مزرعة ٨٠٠ ألف كتار.

جلود: ۷۰۰.

عبد الناصر: ٧٠٠ ألف هكتار؟!

جلود: ۷۰۰.

عبد الناصر: آه.. أصل ۷۰۰ ألف هكتار يعنى ٣ مليون فدان!

جلود: أي.

عبد الناصر: ٧٠٠ ألف يعنى دولة زراعية نمرة واحد لذلك استغربت أوى!

صوت: النهارده المزارع عاملين لها حدود ما بين ٢٠٠ و ٧٠٠ ويمكن في الآخر هتتكلف ٨٠ مليون جنيه، انما أنا بعتقد فريق الدراسة بتاعتنا المياه طالعة..

عبد الناصر: سخنة.

صوت: أيوه.. انما التسرع يعنى نخش على مشاريع مش مدروسة دى مش كويسة.

عبد الناصر: لا.. لأ.. ما ندخل؛ لأن اذا كنا إحنا مستشارينا هيبقي لهم كلام اذا عملنا حاجة غلط بيبقي فيه لوم.

جلود: الصناعات أي.. مصانع كتيرة.

صوت: اللبن وصناعة الألبان.

عبد الناصر: يعنى إحنا عملنا مصانع ألبان بس مقدرناش نلم لها لبن! (ضحك)

صوت: بس هناك كله شغال على مصنع البودرة بس فمش قادر يصنع زى الجبنة نبقى نقول له يستورد.

جلود: في الحرب شئ زي البودر حاجة زي كده زي البودر.

عبد الناصر: آه.. قال هو النابالم اللي بيحرق.

جلود: لأ حاجة زي البودر .. زي البودر بالضبط.

عبد الناصر: تعمل ايه؟

جلود: يعنى والله مش عارف الجنود.

عبد الناصر: اللي هي تحرق.. نابالم بس مش سائل بودرة نابالم، دي من عند فرنسا دي من الفرنساويين.

جلود: عندكوا منها؟

عبد الناصر: لازم عندنا.

جلود: دى مهمة جدا.

عبد الناصر: دى عند الفرنساويين هم جابوها من الفرنساويين.

جلود: طب نستأذن.

عبد الناصر: طيب ياعد السلام مستنينك في العودة انشاءالله.

جلود: والله مش عارف بأى منطق هنكلمهم!

عبد الناصر: حاجات وصواريخ فيه والله ممكن يساعدكوا في الصناعة، بس هو عيب الصينين إنهم بيعملوا حزب شيوعي صيني.. الروس بطلوا العملية دى خالص يعني، وبعدين الشيوعي الصيني ده حزب دموى يسار اليسار. أنا رأيي إن الصناعة طالما عندكم فلوس.. إحنا أصلنا معندناش فلوس فبناخد قرض بجيب منه، لكن عندك فلوس بتقدر تاخد أحسن مصنع في العالم أمريكاني – روسي – الماني – فرنساوي.

جلود: التشغيل.

عبد الناصر: يعنى إحنا في هذا نقدر نساعدكم.

جلود: نتعاون.

عبد الناصر: آه.. يعنى إحنا بدل ما نقول نقيم مصانع مشتركة..

صوت: مشاريع.

عبد الناصر: لا.. هو يعمل الموتور وأنا أعمل الكهربا زى ما هم عاملين فى الكتلة الشرقية؛ لأن حكاية مصنع مشترك غير الانتاج المشترك، أو مثلا إحنا بنعمل تليفزيون إنت تعمل الشاشة وإحنا نعمل الصمامات زى ماهم عاملين مثلا فى روسيا.. العربية الفيات واخداها روسيا.

جلود: إحنا بنحتاج للخبرة.

عبد الناصر: صناعة مشتركة إحنا ماهندفع رأس مال في هذا.

جلود: إحنا حاطين ١٠٠ مليون.

عبد الناصر: صناعة؟

صوت: ۱۸۰ مليون صناعة وزارعة.

عبد الناصر: السنة دى؟

تيجي بقي مستنينك.

جلود: انشاءالله.